



TEKS

KHUTBAH

NEGERI PAHANG

FEBRUARI 2026

LAILATUL QADAR 13 MAC 2026M | 23 RAMADAN 1447H

الْحَمْدُ لِلَّهِ الَّذِي أَرْسَلَ رَسُولَهُ بِالْهُدَىٰ وَدِينِ الْحَقِّ لِيُظْهِرَهُ عَلَى الدِّينِ
كُلِّهِ وَلَوْ كَرِهَ الْمُشْرِكُونَ،

أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ سَيِّدَنَا مُحَمَّدًا
عَبْدَهُ وَرَسُولَهُ، اللَّهُمَّ صَلِّ وَسَلِّمْ وَبَارِكْ عَلَى سَيِّدِنَا مُحَمَّدٍ وَعَلَى آلِهِ
وَأَصْحَابِهِ وَمَنْ تَبِعَهُمْ بِإِحْسَانٍ إِلَى يَوْمِ الدِّينِ.

أَمَّا بَعْدُ، فَيَا عِبَادَ اللَّهِ، اتَّقُوا اللَّهَ حَقَّ تَقَاتِهِ وَلَا تَمُوتُنَّ إِلَّا وَأَنْتُمْ
مُسْلِمُونَ.

Marilah kita berusaha meningkatkan keimanan dan ketakwaan kepada Allah ﷻ dengan melaksanakan segala suruhan dan menjauhi segala larangan-Nya. Mudah-mudahan kita peroleh keampunan di dunia dan akhirat.

Sidang Jumaat yang dirahmati Allah Subhanahu wa Taala,

Kita telah pun memasuki sepuluh hari terakhir dalam bulan Ramadan. Sudah pasti dambaan setiap orang yang beriman pada ketika ini adalah untuk dapat berjumpa dengan Lailatul Qadar. Lailatul Qadar merupakan malam yang sangat agung dan istimewa dalam bulan Ramadan. Ia adalah malam yang dipenuhi dengan rahmat, keampunan dan keberkatan, malam yang lebih baik daripada seribu bulan. Pada malam inilah al-Quran diturunkan sebagai petunjuk kepada seluruh manusia. Allah ﷻ merakamkan keistimewaan Lailatul Qadar dalam surah al-Qadr ayat 1 hingga 5:

أَعُوذُ بِاللَّهِ مِنَ الشَّيْطَانِ الرَّجِيمِ

بِسْمِ اللَّهِ الرَّحْمَنِ الرَّحِيمِ

إِنَّا أَنْزَلْنَاهُ فِي لَيْلَةِ الْقَدْرِ وَمَا أَدْرَاكَ مَا لَيْلَةُ الْقَدْرِ لَيْلَةُ الْقَدْرِ خَيْرٌ مِّنْ أَلْفِ

شَهْرٍ تَنَزَّلُ الْمَلَائِكَةُ وَالرُّوحُ فِيهَا بِإِذْنِ رَبِّهِمْ مِّنْ كُلِّ أَمْرٍ سَلَامٌ هِيَ حَتَّىٰ مَطْلَعِ

الْفَجْرِ

Yang bermaksud: “*Sesungguhnya Kami telah menurunkannya (Al-Quran) pada Malam al-Qadar. Tahukah kamu apakah Malam*

al-Qadar itu? Malam kemuliaan itu lebih baik daripada seribu bulan. Pada malam itu, turun para malaikat dan Jibril dengan izin Tuhan mereka, kerana membawa segala perkara (yang ditakdirkan berlaku pada tahun yang berikut); Sejahteralah Malam (yang berkat) itu sehingga terbit fajar!.”

Sidang Jumaat yang dikasihi,

Kita telah ditunjukkan dengan tauladan bahawa Rasulullah ﷺ begitu gigih beribadah pada sepuluh malam terakhir pada bulan Ramadan. Walhal, Rasulullah ﷺ adalah seorang Nabi dan Rasul, kekasih Allah yang sudah dijamin tempatnya di syurga. Pasti ada kelebihan yang sangat istimewa pada sepuluh malam terakhir Ramadan ini. Jika tidak, takkanlah Baginda Rasulullah ﷺ bersungguh-sungguh memberikan tumpuan kepada solat malam dan ibadah-ibadah lainnya, hingga Baginda sanggup bersengkang mata meninggalkan kenikmatan tidur malam dan mengetepikan seketika urusan-urusan lain. Disebutkan dalam hadis yang diriwayatkan oleh Imam Muslim:

كَانَ رَسُولُ اللَّهِ صَلَّى اللَّهُ عَلَيْهِ وَسَلَّمَ يَجْتَهِدُ فِي الْعَشْرِ الْآخِرِ ،

مَا لَا يَجْتَهِدُ فِي غَيْرِهِ

Yang bermaksud: “*Rasulullah ﷺ berusaha sedaya upaya pada sepuluh malam terakhir Ramadan melebihi usahanya dari malam-malam yang lain*”.

Sebenarnya Baginda ﷺ ingin menunjukkan contoh kepada kita semua supaya memberikan fokus yang tinggi kepada amal ibadah dan mendapatkan kelebihan Lailatul Qadar. Rasulullah ﷺ juga bersabda dalam sebuah hadis yang diriwayatkan oleh Imam al-Bukhari:

مَنْ قَامَ لَيْلَةَ الْقَدْرِ إِيمَانًا وَاحْتِسَابًا غُفِرَ لَهُ مَا تَقَدَّمَ مِنْ ذَنْبِهِ

Yang bermaksud: “*Sesiapa yang menghidupkan malam al-Qadar dengan keimanan dan pengharapan (kepada reda Allah), maka akan diampuni dosa-dosanya yang telah lalu.*”

Banyak sekali hadis nabi dan pendapat ulama tentang bilakah berlakunya Lailatul Qadar. Ada yang mengatakan pada malam 17, 21, 23, 24, 25, 27 dan malam 29. Apa yang pasti, tarikhnya yang tepat dirahsiakan oleh Allah ﷻ. Antara hikmah utamanya ialah agar umat Islam bersungguh-sungguh beribadah sepanjang bulan Ramadan, khususnya pada sepuluh malam terakhir, dan tidak hanya beramal pada satu malam tertentu sahaja.

Sidang Jumaat yang dikasihi,

Teruskanlah kekal istiqamah beribadah bersungguh-sungguh terutama pada saat-saat akhir ini, insya-Allah mudah-mudahan akan mendapat kelebihan malam Lailatul Qadar. Rasulullah ﷺ bersabda dalam hadis yang diriwayatkan oleh Imam Ahmad yang bermaksud:

“Carilah malam al-Qadar pada sepuluh malam terakhir pada malam yang ganjil.”

Saidatina Aisyah رضى الله عنها pernah bertanya kepada Rasulullah ﷺ dalam hadis yang diriwayatkan oleh Imam al-Tirmizi yang bermaksud:

“Wahai Rasulullah, jika aku mengetahui malam itu adalah Lailatul Qadar, apakah doa yang patut aku baca?”

Maka Rasulullah ﷺ bersabda:

قُولِي: اللَّهُمَّ إِنَّكَ عَفْوٌ تَحِبُّ الْعَفْوَ فَاغْفِرْ عَنِّي

Yang bermaksud: *“Ucapkanlah: Ya Allah, sesungguhnya Engkau Maha Pemaaf dan menyukai kemaafan, maka maafkanlah aku.”*

Janganlah kita leka dalam membuat persediaan menyambut Aidilfitri sehingga menghilangkan tumpuan untuk melipatgandakan usaha mencari Lailatul Qadar. Jadilah kita antara golongan yang mengimarahkan masjid dan surau, meneruskan tadarus al-Quran, menghidupkan malam serta amal ibadah yang lain.

Sidang Jumaat yang berbahagia.

Mengakhiri khutbah, dapatlah disimpulkan beberapa perkara penting:

Pertama, Lailatul Qadar adalah malam yang sangat istimewa. Ganjaran ibadah pada malam itu lebih baik daripada ibadah seribu bulan atau bersamaan kira-kira 83 tahun.

Kedua, kita mesti mencontohi kesungguhan Rasulullah ﷺ menggandakan amal ibadah Baginda pada sepuluh malam yang terakhir dalam bulan Ramadan.

Ketiga, Allah ﷻ merahsiakan bilakah malam Lailatul Qadar agar kita terus beristiqamah memberikan tumpuan sebaik-baiknya dalam melaksanakan amal soleh sepanjang Ramadan.

أَعُوذُ بِاللَّهِ مِنَ الشَّيْطَانِ الرَّجِيمِ

وَسَارِعُوا إِلَى مَغْفِرَةٍ مِّن رَّبِّكُمْ وَجَنَّةٍ عَرْضُهَا السَّمَوَاتُ وَالْأَرْضُ

أُعِدَّتْ لِلْمُتَّقِينَ ١٣٣

بَارَكَ اللَّهُ لِي وَلَكُمْ فِي الْقُرْآنِ الْعَظِيمِ، وَنَفَعَنِي وَإِيَّاكُمْ بِمَا فِيهِ مِنَ
الْآيَاتِ وَالذِّكْرِ الْحَكِيمِ، وَتَقَبَّلْ مِنِّي وَمِنْكُمْ تِلَاوَتَهُ، إِنَّهُ هُوَ السَّمِيعُ
الْعَلِيمُ. أَقُولُ قَوْلِي هَذَا وَأَسْتَغْفِرُ اللَّهَ الْعَظِيمَ لِي وَلَكُمْ، وَلِسَائِرِ
الْمُسْلِمِينَ وَالْمُسْلِمَاتِ، وَالْمُؤْمِنِينَ وَالْمُؤْمِنَاتِ، فَاسْتَغْفِرُوهُ إِنَّهُ هُوَ
الْغَفُورُ الرَّحِيمُ.